

BOSNA I HERCEGOVINA
OSNOVNI SUD BRČKO DISTRIKTA
BOSNE I HERCEGOVINE
Broj: 96 o Ps 143435 21 Ps
Brčko, 05.04.2024.godine

U IME BRČKO DISTRIKTA BOSNE I HERCEGOVINE!

Osnovni sud Brčko distrikta Bosne i Hercegovine, sudija Zobenica Ljiljana, u pravnoj stvari tužioca Brčko distrikt BiH, zastupan po Pravobranilaštvu Brko distrikta BiH, protiv tuženog Udruženje za informatiku, bežične mreže i napredne tehnologije "Global Wireless Network" Brčko, zastupano po M.A., licu ovlaštenom za zastupanje i advokatu Milićević Darku iz ZAK „Milićević Darko i Fazlić Mirza“ iz Brčkog, radi raskida ugovora i isplate, v.sp. 40.000,00 KM, donio je dana 05.04.2024.godine

P R E S U D U

Raskida se ugovor o finansijskoj podršci broj: 13-003896/19 od 27.12.2019. godine, koji je zaključen između tužioca Brčko distrikt BiH, kao davaoca sredstava i tuženog Udruženje za informatiku, bežične mreže i napredne tehnologije "Global Wireless Network" Brčko, kao korisnika sredstava.

Obavezuje se tuženi da tužiocu isplati iznos od 40.000,00 KM, na ime vraćanja dodijeljenih novčanih sredstava, sa zakonskom zateznom kamatom od 01.12.2021. godine kao dana podnošenja tužbe do konačne isplate, kao i da tužiocu nadoknadi troškove parničnog postupka u iznosu od 2.940,00 KM, sve u roku od 30 dana od dana pravosnažnosti presude.

O b r a z l o ž e n j e

Tužilac je ovom sudu, dana 01.12.2021.godine, podnio tužbu protiv tuženog radi raskida ugovora i isplate. U tužbi je naveo da je odlukom o odobravanju isplate novčanih sredstava Vlade Brčko distrikta BiH-Odjeljenja za stručne i administrativne poslove broj:13-003896/19 od 27.12.2019.godine, tuženom odobrena isplata novčanih sredstava u iznosu od 40.0000,00 KM, za finansiranje redovnog rada. Na osnovu navedene odluke, tužilac i tuženi su zaključili ugovor o finansijskoj podršci broj: 13-003896/19 od 27.12.2019.godine, kojim tužilac kao davalac novčanih sredstava-granta daje tuženom iznos od 40.000,00 KM. Isplata je izvršena 16.01.2020.godine. Tuženi nije izvršavao svoje ugovorom preuzete obaveze, konkretno, nije podnio izvještaj o načinu trošenja novčanih sredstava zbog čega je tužilac tuženom dana 25.06.2021.godine uputio i opomenu za podnošenje dopune izvještaja o načinu trošenja granta dodijeljenog u 2019.godini. Kako tuženi nije ispunio svoje ugovorom preuzete obaveze, odnosno nije opravdao utrošak dodijeljenih sredstava-grantova, tužilac je tužbenim zahtjevom predložio da se raskine ugovor o finansijskoj podršci, broj:13-003896/19 od 27.12.2019.godine, koji je zaključen između tužioca i tuženog, te da se obaveže tuženi da tužiocu vrati iznos od 40.000,00 KM, sa zakonskom zateznom kamatom od dana podnošenja tužbe do isplate, kao i da tužiocu nadoknadi troškove parničnog postupka.

U odgovoru na tužbu od 13.10.2022.godine, koju je podnio Đ.S. preko punomoćnika, kao jedno od lica ovlaštenih za zastupanje tuženog, navedeno je da osporava u cjelosti tužbu i postavljeni tužbeni zahtjev. Tuženi je osnovan 2015.godine, a jedan od osnivača je bio i Đ.S. Udruženje je duži niz godina poslovalo uspješno,

zaključivalo ugovore o finansijskoj podršci, bilo korisnik grant sredstava koje je uredno pravdalo i redovno nadležnim organima dostavljalo blagovremene izvještaje o utrošenim finansijskim sredstvima. Tokom 2019.godine jedan od osnivača i članova udruženja dobija poslovnu priliku za rad u inostranstvu, te zbog novonastale situacije i nemogućnosti da konstantno radi u udruženju, odlučuje da briše udruženje iz sudskog registra. Navedenom članu udruženja ponuđeno je da se izvrši promjena osnivača društva i da se imenuju nove odgovorne osobe. Tako tokom 2019.godine dolazi do brisanja lica H.S., kao osnivača društva, te upisavanja nova dva člana društva. Navodi da je i on imao namjeru da se ispiše iz sudskog registra društva, međutim zbog neplaćenih novčanih kazni u momentu preregistracije udruženja nije bilo dozvoljeno brisanje iz sudskog registra, te je Đ.S. formalno pravno nastavio da bude član i osnivač društva. Nakon što su dva nova lica upisana u sudski registar kao odgovorna lica, faktičko djelovanje Đ.S. u pogledu zastupanja udruženja je u potpunosti prestalo. Navodi da on nikada nije upoznao nova odgovorna lica u tom udruženju, nikada nije bio pozvan, niti je prisustvovao i jednoj sjednici udruženja, niti je učestvovao u radu i odlučivanju. Lica ovlaštena za zastupanje udruženja su M.A. i Č.M., tako da Đ.S. nije predstavljao, niti zastupao društvo u pravnom prometu na bilo koji način. Smatrao je da je udruženje prestalo sa radom, te se zbog drugih poslovnih i privatnih razloga nije zanimao za stanje i rad udruženja, sve do dana kada mu je dostavljena tužba. Predložio je da sud tužbu i tužbeni zahtjev odbije kao neosnovan.

Lice ovlašteno za zastupanje tuženog M.A., koja je u tom svojstvu i potpisala ugovor čiji se raskid traži, u odgovoru na tužbu od 20.11.2023.godine je osporila tužbu i postavljenu tužbeni zahtjev, navodeći da nisu ispunjeni uslovi za raskid ugovora, niti postoje materijalno pravne i činjenične pretpostavke za usvajanje kondemnatornog zahtjeva.

U toku parničnog postupka provedeni su dokazi čitanjem: Dopisa odjeljenja za stručne i administrativne poslove Vlade Brčko distrikta BiH, broj: 13-000750/21 od 09.09.2021.godine, Odluke Odjeljenja za stručne i administrativne poslove Vlade Brčko distrikta BiH, broj: 13-003896/19 od 27.12.2019.godine o dobravanju isplate novčanih sredstava, Ugovora o finansijskoj podršci koji je zaključen 31.12.2019.godine pod brojem 13-003896/19, Izvoda Sber banke od 16.01.2020. godine, Opomene Odjeljenja za stručne i administrativne poslove Vlade Brčko distrikta BiH, broj: 13-000750/21 od 25.06.2021.godine upućene tuženom za podnošenje izvještaja o načinu utroška granta, saslušanjem svjedoka J.N.

U toku postupka tuženi je odustao od prijedloga da se sasluša zakonski zastupnik tuženog, M.A.

Iz Izvoda Sber banke za dan 16.01.2020.godine, sud je utvrdio da je tuženom tog dana isplaćen iznos od 40.000,00 KM.

Iz Odluke o odobravanju isplate novčanih sredstava Odjeljenja za stručne i administrativne poslove broj: 13-003896/19 od 27.12.2019. godine, utvrđeno je da je tuženom odobrena isplata iznosa od 40.000,00 KM za finansiranje redovnog rada.

U Ugovoru o finansijskoj podršci od 31.12.2019.godine, koji je zaključen između Brčko distrikta kao davaoca sredstava i Udruženja za informatiku, bežične mreže i napredne tehnologije "Global Wireless Network" Brčko, koga zastupa M.A., kao korisnik sredstava, te da je svrha dodjele finansiranje redovnog rada, kao i ostalih troškova koji obuhvaćeni finansijskim planom, koji je odobrila komisija za utvrđivanje prihvatljivosti planova i programa rada ili zahtjeva mjesnih zajednica, udruženja građana i fondacija

Brčko distrikta BiH. Odredbom člana 3. ugovora tuženi kao korisnik sredstava se obavezao da će dobijena sredstva utrošiti namjenski, svrsi shodno i ekonomično. Članom 4. ugovora korisnik se obavezao da podnese izvještaj o namjenskom trošenju sredstva u roku od 30 dana od okončanja projekta, a za sredstva koja se ne odnose na projekte, do dana podnošenja zahtjeva za nova sredstva, a najkasnije do 30.09. naredne godine. Članom 6. Ugovora je propisano, da ukoliko korisnik sredstava ne opravdava utrošak dobijenih sredstava neće mu biti dodijeljena sredstva iz budžeta naredne godine, a neopravdano utrošena sredstva je dužan vratiti, nakon što ga na to pismenim putem pozove davalac sredstava.

Iz Obavještenja Odjeljenja za stručne i administrativne poslove Vlade Brčko distrikta BiH od 09.09.2021. godine, upućenog Pravobranilaštvu Brčko distrikta BiH, navedeno je da prema članu 22. stav 6. i stav 7. Zakona o izvršenju budžeta Brčko distrikta BiH za 2019.godinu („Sl. glasnik Brčko distrikta BiH“ broj: 9/19), korisnici sredstva moraju podnijeti izvještaj o namjenskom utrošku sredstava dodijeljenih za realizaciju projekta 30 dana od dana okončanja projekta. Korisnici granta kojim se dodjeljuju sredstva koja se ne odnose na projekte dužni su podnijeti izvještaj o namjenskom utrošku sredstava dodijeljenih u prethodnoj godini do dana podnošenja zahtjeva za nova sredstva, a najkasnije do 30.09. naredne godine. U navedenom dopisu, nadležno odjeljenje je obavijestilo Pravobranilaštvo koji korisnici sredstva su prekršili obaveze koje proizilaze iz ugovora kao i zakona o izvršenju Budžeta Brčko distrikta BiH za 2019.godinu, te se između ostalih u grupi subjekata koji uopšte nisu dostavili izvještaj nalazi i ovdje tuženi.

Svjedok J.N., je u iskazu koji je dao pred sudom, naveo da je tokom 2019.godine radio u Odjeljenju za podršku mjesnim zajednicama. Naveo je da u pogledu zahtjeva tuženog za grant, da nije učestvovao u toku postupku, ali mu je kao predsjedniku komisije za grantove poznato da je tuženom isplaćen iznos od 40.000,00 KM. Zadatak komisije za grantove je da pregleda finansijski izvještaj utroška sredstava svih korisnika sredstava. Navedena komisija je radila do 30.09.2020. godine, kada je bio krajnji rok za podnošenje izvještaja o utrošku sredstava svih korisnika, a zbog obima posla, produžen je rad komisije do 2021.godine. Do kraja rada komisije, tuženi nije podnio izvještaj. Kada je komisija završila sa radom, sve subjekte koji do tada nisu dostavili izvještaj, ponovo je pozvala da te izvještaje dostave. Na upit punomoćnika tuženog, svjedok je naveo da su kroz ovakvu vrstu grantova dodijeljivana sredstva za redovan rad i pomoć u radu. Svi grantovi koji se dijele u toku tekuće godine za redovan rad, odnose se na tu godinu i svi računi i svi troškovi koji su nastali u tok godini se prihvataju do momenta predaje izvještaja. Sud je prihvatio iskaz svjedoka kao potpun i istinit, nalazeći da je isti u saglasnosti sa materijalnom dokumentacijom u spisu.

Predmet ovog tužbenog zahtjeva je raskid ugovora zaključenog između tužioca i tuženog, dana 27.12.2019.godine zbog neispunjenja obaveza tuženog iz predmetnog ugovora, te zahtjev tužioca da mu tuženi vrati iznos od 40.000,00 KM, na ime vraćanja dodijeljenih novčanih sredstava.

Odredbom člana 4. Ugovora o finansijskoj podršci od 31.12.2019. godine, tuženi kao korisnik sredstava je preuzeo obavezu da podnese izvještaj o namjenskom trošenju sredstava u roku od 30 dana od dana okončanja projekta, a za sredstva koja se ne odnose na projekte do dana podnošenja zahtjeva za nova sredstva, a najkasnije do 30.09. naredne godine. Iz sadržine ugovora proizilazi da su tuženom sredstva dodijeljena za finansiranje njegovog redovnog rada, a ne za realizaciju nekog projekta. To dalje znači, da je tuženi bez obzira što je ugovor zaključen krajem 2019. godine, imao

obavezu da najkasnije do 30.09.2020.godine podnese izvještaj o namjenskom trošenju sredstava koja su mu dodijeljena. Iz iskaza svjedoka J.N., kao i iz dopisa Odjeljenja za stručne i administrativne poslove od 09.09.2021.godine, proizilazi da tuženi nije dostavio izvještaj o utrošku sredstava do 30.09.2020.godine, niti čak do 09.09.2021.godine, kada je dopis sačinjen.

Odredbom člana 132. Zakona o obligacionim odnosima („Sl. list SFRJ“, broj: 29/78, 39/85, 45/89, 57/89 - u daljem tekstu ZOO-a), propisano je da ukoliko je jedna strana izvršila ugovor potpuno ili djelimično, ima pravo da joj se vrati ono što je dala. Odredbom člana 124. istog zakona je propisano, da u dvostranim ugovorima, kada jedna strana ne ispuni svoju obavezu, druga strana može, ako nije šta drugo određeno, zahtjevati ispunjenje obaveze ili raskinuti ugovor prostom izjavom, ako raskid ugovora ne nastupa po samom zakonu, a u svakom slučaju ima pravo na naknadu štete.

Iz provedenih dokaza je utvrđeno, da je tužilac kao davalac sredstava, svoju obavezu ispunio uplatom novčanog iznosa od 40.000,00 KM na račun tuženog, dana 16.01.2020.godine. S druge strane, tuženi nije ispunio obavezu propisanu ugovorom o dostavljanju izvještaja o namjenskom trošenju sredstava do 30.09.2020.godine, kao krajnjeg datuma do kada se taj izvještaj mogao dostaviti. Tuženi nije dostavio izvještaj o namjenskom trošenju sredstava ni tokom 2021.godine, odnosno do prestanka rada komisije za dodjelu granta. Imajući navedeno u vidu, sud smatra da postoji osnov za raskid predmetnog ugovora, te je odlučio kao u stavu jedan izreke ove presude, na osnovu odredbe člana 124. ZOO-a. Na osnovu odredbe člana 132. stav 2. ZOO-a, sud je obavezao tuženog da tužiocu vrati iznos od 40.000,00 KM, koji mu je tužilac kao ugovorna strana uplatio. Na navedeni iznos, tužiocu je dosuđena zakonska zatezna kamata od 01.12.2021.godine, kao dana dospelosti duga, a na osnovu odredbe člana 277. ZOO-a.

Odluka suda o troškovima parničnog postupka zasniva se na odredbi člana 120. stav 1. ZPP-a. Tuženi je dužan tužiocu naknaditi troškove parničnog postupka koji čine: troškovi sastava tužbe u iznosu od 840,00 KM, troškovi zastupanja tužioca na dva odložena pripremna ročišta, 07.09.2023.godine i 13.11.2023.godine u iznosima od po 210,00 KM (25% nagrade, s obzirom da su ročišta odložena uz saglasan prijedlog obe parnične stranke), troškovi zastupanja na održanom pripremnom ročištu 31.01.2024.godine u iznosu od 840,00 KM i ročištu za glavnu raspravu održanom 05.04.2024.godine u iznosu od 840,00 KM, odnosno ukupan iznos od 2.940,00 KM. (prema aritmetičkom prosjeku nagrada po Tarifama o nagradama i naknadi troškova za rad advokata FBiH i RS).

POUKA O PRAVNOM LIJEKU :

Protiv ove presude dozvoljena je žalba u roku od 30 dana od dana prijema iste Apelacionom sudu Brčko distrikta BiH, putem ovog suda.

S U D I J A

Ljiljana Zobenica